

四庫全書

集部

欽定四庫全書

集部

青城山人集卷三

詳校官檢討

臣

羅國俊

中書

臣

劉源溥覆勘

覆校官中書

臣

田尹衡

校對官中書

臣

嵇承志

謄錄監生

臣

劉文耀

欽定四庫全書

青城山人集卷三

明 王燧 撰

七言古詩

送鄭御史僉憲四川

鄭君夙抱青雲志十載未能施利器東書曾向西南遊
漢蜀山川歸攬轡名藩大府幣郊迎肯屈大材從小試
下幃涵潤百氏言閉戶研窮六經義胸中蘊蓄既汪洋
筆底文詞轉滂沛長風驟疾掛高帆峻坂崎嶇奔逸驥

潛淵神彩竟難藏
衝斗虹光終莫閔
我皇嗣位握乾符
詔遣輶車求俊乂
幡然遠應薦章來
闕下才華推賈誼
玉堂編纂列羣英
金匱抽書發中祕
嘉謨盛訓與討論
聖德神功煩載紀
詞林本自號神仙
象服矧兼金勇貴
編成上獻黼座前
寶匣封緘貽永世
內帑盤花文綺段
儀曹奉勅親頒賜
金章紫誥出九重
全蜀黎民付專治
手持憲節望劍關
一路風霜變淒厲
親知送別登鳳臺
四座喧呼增意氣
嗟予識君雖恨遲
每讀雄文如舊契

人生相知良獨難浮世佳逢亦非易樽前興發酒再沽
橐內金空衣可質志士誰當嚴鞬勒丈夫不用多軒輊
長歌贈君情奈何苦節冰霜勸君勵

古磚篆文歌

洪武某年范陽盧公武氏嘗過予城南舊居
道出僧坊見甃壁古磚上有篆文隱起勢甚
奇偉公武欲求得之時僧塗墍方畢飾吝損
壞弗肯予今年余復見之因抉壁豪取而公

武歿已數載遂歸於公武猶子次農并作歌
紀焉夫此碑不知綿歷幾千百年始獲發於
公武今公武歿又數載不為它人持去而余
獲歸於次農是宜物之遇有其時抑亦世之
好事者恒鮮得耶今年寔洪武丁卯也

范陽盧君好奇古羅網前聞用心苦荒巖窮澤遍探求
斷畫殘鈎總哀聚昔過僧宇見陶甓上隱遺書可瞻覩
斑痕不假琢石磨缺角寧煩煉金補剝苔剝蘚試研尋

浣土滌塵細摩拊未知纖悉無舛訛已覺縱橫合規矩
疑從盆缶窺禹鼎似向崔蒲獲荆梏世遠那能究源委
紋完尚可推編部詭形轉摺龍盤拏逸態飛騰鳳騫舞
整如康衢駕列駟踞若高岡蹲怒虎氣吞鄢郢練三千
價陋咸陽城十五蛇奔虺走莫徒誇劍拔弩張安足數
範撫既不類臣斯體骨未應同詛楚恍駕孔壁得科斗
真訝岐陽逢石鼓吁嗟篆法多變化惆悵簡書趨莽鹵
不知此字誰揮洒欲與籀史爭參伍緬想東吳稱霸強

曾聞季扎聽韶獲一時文物豈無傳千古字書當有祖
後人自合重千金故物不宜充百堵擬令僕夫遂攜挾
無奈主僧猶吝予中心往來累暮朝纏次周流更子午
我昨重來經舊地盧君已歿歸荒土壁傾僧去物幸存
水濯雨淋丈不窳巴夷那識貴陽春甌駱由來賤章甫
世無博雅同賞鑑獨發長吁為收取終然雄劍起豐城
畢竟明珠還合浦可憐盧君難復生賴有阮咸能嗣武
嘗臨滄海眺三韓曾入青徐弔梁父篋裡富儲金石錄

留中宏闢圖書府願言持送歸寶藏請共知音辨魚魯

白鶴山房

白鶴何年過海東翩然飛落山之中只今鶴去幾千載
惟有青山鎮長在青山長在人民非白鶴何如竟不歸
美人結屋山中住朝對林霏暮巖雨它日松窓短夢驚
山中應有鶴來鳴

重題

我從天上歸重到白鶴山青山宛如昔白鶴何時還白

鶴不還那足惜美人一去長相隔茫茫瘴嶺數千重
悵望旅魂歸不得我欲臨風歌大招楚雲湘水不勝遙
相思有淚知多少地老天荒恨未消

潘宅菖蒲歌用謝疊山先生韻

潘夫子辭雄成好山入座雙眸青一拳特立太古上影
落萬丈之圓靈幽蒲葉綠弄晴旭勁節默與吾心盟長
飈卷沙雲脚斷臞臞蘚膏天無情孤花熒熒識者少
不與俗物同條生波心蟠根五蹙縮直氣射日凌滄瀛

斜拖玉杖乘風行目擊意會忘其形崧高仙人在何許
齊州九點烟空橫長林雲散月皎皎密樹露滴天冥冥
乃知造物有深巧笑談彷彿成珠庭清香一吸九竅潔
飽德不使饑腸鳴窻間娟娟曉凝翠耳畔簌簌寒流聲
我聞長生有奇術便宜寡慾遺塵纓我嬰舊感浪作賦
種魚細事空傳經何如白頭梅子貞飲芳嚼秀三千齡
眇觀寰海一盃小半夜夢落青雲城我言雖狂有至理
世人聞此猜而驚潘夫子心和平膚腴貌古神尤清逍

遙谷中住未夕藥囊到處留餘馨潘夫子不可輕江山
一攬萬里足孰謂智者無完名

山月軒

九山有月明如鏡月色山光互輝映君家故業隱山中
幾度獨吟秋夜靜夜靜山谷月倍明看山對月有餘情
一輪艷彩河邊樹數點螺鬟天際青自從來作京華客
何處却看山月色鳳凰臺下晚春時石頭城畔涼秋夕
新月還同舊月華故山回首是天涯但喜人生逢賞事

那知明月落誰家知君名紀神仙闕桂子含香待攀折
行看直舍埽花陰未許還山重對月

題採菱圖

湖南風信起湖北浪花多欲唱採蓮曲翻成採菱歌採
菱歌斷汀州暮何處却尋歸去路誰搖蘭艇笑相迎燈
火遙生白蘋渡

苕溪余舊所經遊秋高氣淒風清水落遠近
漁歌更唱互荅舟行沿洄恍若世外別來不

知幾寒暑矣中吳徐希孟攜謝孔昭所臨松
雪翁採菱圖索詩為作吳歌題其上不能不
動江南之思也吳人王汝玉書于玉堂京署
時永樂己丑上巳日也

送張文琮之官新城

先生家本東州住蚤歲才名人共許十年再易廣文韞
兩邑英才沾化雨忽報慈親與世違高堂灑淚脫斑衣
宿草荒原零露夕寸心方憶報春暉徵書遙自天邊降

野鶴閒猿徒悵望待漏初趨金馬門看花還入烏衣巷
相逢共向鳳城春正值青青柳色新長干道上春衫薄
卓女壚頭綠酒醇君將出宰新城去送別城陰遇朝雨
座中唱徹渭城歌江草江花總愁緒論交何必須故人
昔聞傾蓋即情親為君暫綰離帆住我有中心欲具陳
知君本是巖廊器下邑割雞纔小試中朝藻鑑豈終遺
行見青雲當立致聞說新城隸建昌近來民物頗凋傷
更欲煩君下車日好將寬政恤逃亡

瑤瑟怨

多情莫學澤中蘭，有恨莫爲江上蓮。
蘭心守死心不改，蓮根折斷絲猶牽。
君不見天荒地老皆如此，千古湘娥怨湘水。
至今血淚灑叢篁，點點香含露痕紫。
潯陽西望烟淒淒，鷓鴣飛入烟中啼。
蒼梧波杳彩雲滅，萬里孤光秋月迷。
西風北渚蘋花白，歸夢未知身是客。
夜彈瑤瑟渡江來，九疑翠黛濃如滴。

雷雨護嬰圖

雷憑憑雨溟溟母抱兒中野行母心苦兒心驚掩兒耳
令勿聽東西四顧屢屏營人生至愛天所生胡為武才
人獨無母子情

雪洲圖為江陰夏叔度賦今其孫珙珍藏於家
江雲漫漫天漠漠凍雲著風吹不薄巫娥翠失十二鬟
春花亂零飛雪落千山萬山削瑤瑤瀛洲路近芙蓉城
仙人白鳳望不到滿前琪樹紛縱橫樹根誰坐蘧廬底
寒衾布袍僵不起此時清興與誰同惟有騎驢暗香裏

九竹軒為侍講曾蔡作

君家種得青琅玕森然挺立凌雲端
默符陽剛協乾德欲與主人同歲寒
向時分根自何所有客移送來仙壇
時君新魁龍虎榜甲第初賜臨長干
侵晨結珮謁青瑣薄暮入直趨金鑾
夙心雖與此君契何暇問信求平安
一朝春雷動土脈錦裯斑斕香粉乾
大廷奏簡退日早歸來却對青檀欒
蒼龍亂落望無際翟掾高擎知幾竿
騫飛或為鸞鳳舞大矯忽作蛟龍蟠
還疑玉井花亂發

更訝羽林槍列攢胡為滿十仍損一數不成偶奇相看
將同箕疇昔垂範還似虞廷掌命官寧非天道忌盈盛
示君此理戒其完嗟彼佳人在空谷天寒日暮徒長歎
君今高名遍海宇日侍清問班鴛鴦紛紛屢草九重詔
民物樂育皇恩寬簫韶已成獸率舞夷蠻成貢民均歡
勸君冰霜節益勵垂輝青簡終不刊我歌九竹歌未止
天風滿林江月團

和高季迪將進酒

君不見雲中月清光乍圓還又缺又不見枝上花容華
不久落塵沙一生一死人皆有綠鬢朱顏豈能久樽前
但使酒如澠肘後何須印懸斗咸陽黃犬歎已遲至今
千載令人嗤請看古來功業士何如陌上遊冶兒百年
驪忽寄宇內日日歡遊能幾歲勸君莫惜囊中金但趁
生前常買醉臨卽壚頭綠蟻香柳花卷雪春茫茫吳姬
越女邀相向痛飲須盡三千觴興來狂笑縱所適慎勿
畏它權貴客東風吹落頭上巾此日獨醒端可惜一朝

綺羅生網塵粒樓空鎖青娥人酒星不照九泉下孤鳥
自哢山花春解我金貂脫君素裘白日既沒秉燭遨遊
君為我舞我為君歌謠舞相合其如樂何

題李龍眠寫山莊圖

青山萬疊高侵天綠陰千頃晴涵烟巨靈倒挽銀河水
瀉作百丈飛來泉蓬萊三島不可往江南山水稱龍眠
龍眠高人李居士前身列籍瑤臺仙胸中浩蕩有奇氣
眼底恍忽無塵緣同時二友總佳士炯如芙蓉出澄漣

山中一經遊歷後至今草木增清妍百年對畫起遐想
風流文采俱依然辛夷花開木蘭發宛如王維家輞川
我生素抱林泉趣每因匏繫恒自憐邇來繆掌祕閣籍
遍閱圖畫窮幽玄洞天福地似曾識不用謝屐勞扳援

皆山軒為吳太僕賦

滁陽遶郭皆名山丹崖翠壁交迴環西南諸峯更奇絕
平地聳出青螺鬟美人開軒遊息處況占綠水清溪灣
山川明秀風景淑別是洞府非塵寰久居太僕掌馬政

屢聽黃鳥春綿蠻秉心深沈功效著般譽藉藉聞朝班
江淮地方數千里但在野蕃駒馬中驂騮騏驎不知萬
富盛豈止充天閑公餘多暇得自適憑軒蕭索恒怡顏
卷簾忽驚空翠墮拄笏正值孤雲還松梢結巢來皓鶴
竹下放籠開白鷗悠然俯仰足佳趣胷中安得生荆管
青編縹軸列左右雲端五色光爛編詩情畫思時湧發
清氣奕奕衝巾綸天然造化露毫素野花芳草慙妖嬈
追尋醉翁吟笑地想像高致無由攀山僧智仙去已遠

釀泉穀迸空潺湲穿林度壑覓陳迹屐齒印遍苔痕斑
乃知美官有如此底須投筆踰玉闕嗟予亦抱烟霞癖
孤琴乘興良非難十年不渡楊子險詎識關嶺行程艱
菲才繆忝青瑣直日事文墨多裁刪佳穀豐膳叨飽飫
法醞名果加分頒坐忘寒暑屢遷改臨江楓葉霜頻殷
人生托身各有所造物於我誰云慳晴窓偶動卧遊興
消我半日浮生閒琅瑯盡入行樂裏勝境不用虞神奸
長歌一曲遠緘寄不覺新月娥眉彎山靈好事應有識

請置萬壑千巖間露涼夜永煩朗誦激起天籟秋珊珊
紫雲書舍

大江之東紫雲山平地拔出高巔屹晨光霽色蔚蔥蒨
五彩照耀青冥端之子當年讀書處正近紫雲山下住
長時頻見紫雲生終日無心自來去一從捧檄脫荷衣
落月空齋屢夢歸遙憶青山紫雲裡綠蘿應長舊巖扉
知子平生抱材器致身合在青雲際莫將心戀紫雲山
當展忠貞報明世

題梅花

雪花飛度西湖來東風吹上孤山梅林逋宅前春信早
北枝亂吐南枝開我昔扶筇六橋路看花幾度曾延竚
從教寒透素貂裘行徧瑤英最深處江湖舊遊三十年
綠樽空負看花緣休文巧思奪天造一枝香玉橫吳箋
南湖佳士烟霞伴齋閣高懸供適玩持來索我賦梨雲
恍惚花神照揮翰翩然喚醒花前盟總是江空歲晚情
欲挾飛仙花下去莫教玉笛弄新聲

八駿圖

房星光射滎河水化作神駒古無比良工何處運精思
八匹飛來綵毫裏血溝流迸皆頰霞一蹴將窮金母家
氣吞唐廐照夜白豈數郭家獅子花時清不假長驅力
立伏退還春日直桃花浪暖芳草青圉人初解黃金勒
騰驤卧浴得自由笑彼霜勁沙場秋伯樂經過若窺見
乃知世有真驊騮韋庵亦抱支遁癖長恐良才終伏櫪
按圖索駿有餘情恍憶龍池飛霹靂我當喚起曹韓徒

繪昔華山歸馬圖更招能賦杜陵老高歌擊折紅珊瑚

又

昔聞穆王有八駿四海蹴踏風雲起瑤池看遍蟠桃花
歸路日行三百里如何朝下浴晴川不控金羈脫錦韉
春草欲齊青被野浪花新漲綠浮天良工凝思邈真種
氣勢翩翩兀森聳宣獨丹青點抹神定知星宿光芒動
五色照耀連錢丈非止能空冀北羣題詩愧乏少陵善
畫後不見曹將軍劉公寶之當什襲還似千金買駿骨

晴窗展對想奔馳風卷江雲山月出

河清應制

黃河一道來青天發自蔥嶺通于闐沙行石觸走千里
下合衆水成奔川龍門昔經神禹鑿六丁斧痕猶峩峩
瑤池幾度桃花春晝夜濁流長噴薄我皇乘龍秉乾綱
翕張元化陶八荒飛潛動植獻嘉應皇天后地開禎祥
禹渡東西路迢遞一夕河神啟靈祕怒濤帖妥風不驚
澄漪茫茫皓無際恍疑銀漢懸高秋更似瑤島連瀛洲

廣寒宮殿綵雲裏俯瞰三山十二樓
姬周沈璧熒光吐
宮築宣房思漢武當時青簡誇神奇
試較于今何足數
小臣作詩頌河清願播絃管配咸英
傳之三萬六千載
聖子神孫長纘承

蘇臺柳送人還越中

姑蘇臺前楊柳枝萬縷千條拂地垂
江南八月秋光暮
忽逢歸客蘇臺路歸客新從江背來
金鞍暫解憩蘇臺
蘇臺楊柳猶堪折相送歸程到東越
東越迢迢路尚多

離懷別思將如何請君共醉臺前酒聽我新翻楊柳歌
楊柳歌殘聲可憐却憶蘇臺全盛年蘇臺全盛今衰改
唯有臺前楊柳在臺前楊柳最娉婷蕩日搖風無限情
昔時綠帶蔭馳道今日長條拂古城古城下瞰百卷洲
洲上別君令我愁別後相逢在何日明年臺上柳絲柔

周公進旅獒圖

皇姬啟周翦大商明堂南面垂衣裳繫彼西旅宅金方
祇貢厥獒四尺強能搏猛獸斃封狼彼韓洎盧烏敢當

太保公與陳典常不寶遠物邇乃康所寶惟賢邦則昌
丹青誰為圖厥狀表周鴻化垂無疆永貽訓戒示後王
毋肆外欲從禽荒

歌風臺送劉克讓先生之沛縣邑庠

高臺崢嶸凌空開下瞰豐沛何雄哉羣山蜿蜒起東北
猛勢飛度青徐來芒碭前臨如却據行人猶指龍潛處
只今龍去三千霜漢家事業烟蒼蒼山東日落海天濶
大風自起雲飛揚沛中故迹今如此惟有高臺未傾圯

送君去兮空浩歌江南三月春色過姑蘇臺前一杯酒
落花漫漫芳草多渡江水遠山蹉峨它時相思情奈何
情奈何將焉歇君當憶我姑蘇之夕陽我當望君歌風
之明月緘書共達長淮流兩地因之慰離別

題張溪雲畫竹

唐人畫竹推絕倫輞川真為竹寫神筆端抽出鈎鎖法
片片剪落湘雲春澄清亦得此君意金錯刀成世爭貴
數葉蕭疎玉一枝鳳毛龍角誇雄麗張君畫竹何人傳

落墨往往宗輞川佳人天寒翠袖薄滿堂颯颯生風烟
平生跌宕不羈迹尤與此君情莫逆大娘劒器張顛書
奇妙自與常人殊興來大叫數紙盡赤手探得驪龍珠
君今騎鯨躡雲衢百年真跡絕世無爾從何處得此圖
重價自合傾名都我來為爾賦長句詩成總是江南趣
醉揮如意按節歌不知擊折珊瑚樹

題修竹美人圖

蘭膏香膩盤雲綠愁鎖春山黛痕感天寒日暮悄無言

翠袖盈盈倚修竹修竹無心亦有情
竹花結實珠繁縈
秦樓人去綵鸞香湘江種得相思成
相思有種何時歇
竹上年年怨離別千古魂消怨不消
淚紅染成鴛鴦血

題梅莊卷

我家吳山羣玉塢千林雪霽花難數
幾回聽徹青鳥啼
春在南枝北枝吐衝寒載酒花間遊
漠漠梨雲爛不收
暗香疎影發詩思還如何遜在揚州
別來倏忽流光改
夙昔閒情竟何在美人家有梅花莊
十里素香春藹藹

九龍山下三泖東，渾似西湖水。月中市上紅塵飛不到，
玉妃別下廣寒宮。歸心便趁東風起，飛度湖山萬花裏。
狂歌喚取縞衣仙，興捲吳淞半江水。青燈照我客舍寒，
歸計其如行路難。花前勝賞仍負却，坐惜春深香粉殘。
人生百歲渾如寄，還省舊遊憐久棄。題詩為贈梅莊人，
目極瑤英縹天際。

白雲窩

道人昔隱吳山麓，簷下常留白雲宿。道人今住鍾山西，

半攔思借白雲棲吳山鍾山相對起江水江花三百里
多情惟有故山雲長日氤氲落窻几窻几白雲看漸多
道人身在白雲窩興來擊碎鍊如意翻作青天白日起
青天雲起知多少笑指蓬萊山石小滄溟弱水一盃中
咫尺扶桑海光曉我生本是無心人叨入青瑣陪朝紳
平生無限江海趣白雲常與情相親偶來假榻雲窻臥
滿屋白雲寒欲墮橫江孤鶴一聲秋枕上黃糧忽驚破

贈趙丹林先生

晉唐以來善畫者北苑神妙超古今咸英韶舞既興作
世間凡樂皆哇淫丹林趙君抱畫癖毫端彷彿窺其室
匡廬南走控祝融泰岱東撐壓溟渤興來信手勢若飛
屹律縱橫滿高壁自從攜家隱五湖葛巾芒屨儕樵漁
或時落筆益奇絕往往探奪驪龍珠江南巨室爭購得
一紙不惜千緡儲君今冉冉迫垂老君畫從茲愈當寶
我有素蘊雪花皎煩君精意一揮掃回取商巖貌惟肖
明廷恐欲求師保

謝故人送炭

歲云暮矣天荒涼北風蕭颯號枯桑天工銜術逞奇巧
剪冰作花散下方空齋有客羸且病正襟危坐凍欲僵
地爐無火灰亦冷雙足刺若觸劍鉞故人相愛意殊厚
凌晨投以炭二筐瘦形挺然狀雞骨尚帶櫟塢秋烟香
便如暗室正欲覩忽向目前逢夜光施敲石火自吹燎
陡覺羣陰皆遁藏須臾血脉始和暢漸久神氣皆揚揚
信知此物功不細能使陽德隨昭彰吾聞冬至子之半

泰道從此當開陽今年天心亦何事乃遣沴氣妨時暘
絨詩報謝有深感梅花幾日開春香

題高峰讀書處

高峰巉巖凌紫烟下有江水連青天美人隱迹山水裏
閉戶讀書經十年古今成敗歸窮討萬事浮雲皆草草
志趣思同野鶴閒襟懷欲與秋天杳
拂曙來登金馬門一官小試職巡邏公署獨臨湖上村
水光掩映山光冷雞犬不鳴墟落靜卷簾獨坐謾長吟

起看花陰轉虛逕
緬懷當日讀書時
空憶王孫芳草詩
寄語山中舊泉石
滄州別有歲寒期

懷雲圖

九疑之山多白雲
遊子望雲長憶親
親親迢迢幾千里
目斷西風愁綠蘋
斑竹崗連故鄉路
天涯遙指雲飛處
空山秋深霜露寒
落葉蕭蕭壟頭樹
壟樹葉落春還生
人生一去如流星
百年抱恨不能盡
精衛空欲填滄溟
何當寄語洞庭湖
上風為爾掃却行
雲空楚天一碧望

無際綵衣夢舞春花中

望雲思親圖

神京望弋陽蒼山二千里遊子思嚴親遙瞻白雲起白
雲飛來上青天倏忽變化長風前朝隨五老峯頭雨莫
帶香爐頂上烟爾家迢迢白雲下別來幾見流光謝常
將一片思歸心飛逐孤雲落親舍知爾青年才思豐置
身況在栢臺中好從雲去為甘澤忠孝兼全比狄公

奉和御製塔影詩

金仙設教傳人間法王闡化抽玄關遂看靈谷是靈鷲
還指東山為雪山鍾聲曉逐湖聲起江月芒寒天似水
弘敷大法起秋毫彌滿三千大千裏崑崙之水決黃河
滔滔一派東流波人生真源無滯礙何用平地生遮羅
鳥飛兔走朝還昧春去秋來遞更代若能澄淨不生塵
千古靈根鎮長在世間何色與何空空色由來何異同
岸上花開水邊影分明空色有無中誰言金石終成
毀須信真空有真體東園卉木萬般新獨數姚黃并魏

紫世人實解消羣惑樞驥終然脫微纆春風得意騁康
衢長日遨遊趨樂國大漠羣山蔥嶺西法王曾此導沈
迷只今謁帝到中土法雨灑出紅玻璃人喜遷喬出幽
谷快披雲霧瞻晴煜天風吹送天花來萬壑千巖總芬
馥紫霄復見發神光祥雲五色連蒼茫金蓮花開遍古
栢寶塔倒影來長廊迴望鳳城纔咫尺都人瞻仰無晨
夕傾心願効鹿銜花畢竟頓忘駒過隙小臣幸預登香
臺周瞰玉宇消輕埃天書煌煌麗雲漢龍鸞騰舞奎文

開青山盡是烟霞繞玉樹珠林相皎皎法王長贊太平
年九重闔闔春初曉

送鍾遜夫

我來故里翻成客邂逅逢君如舊識栖雲精舍竹林中
暫見仍分端可惜洞庭水落秋風驚汀洲白芷紅蘭生
江頭把酒送君別早潮催送仙舟輕明朝我欲辭家去
吳雲近接神京樹蒼龍闕下有佳期月轉花枝同候

曙

楊節婦吟

婦人託身夫與子有子無夫猶可倚楊家節婦當少年
良人先亡復無嗣嫁時羅襦在篋中連枝尚有雙芙蓉
妾身未亡似餘燼欲作時粧誰為容空閨孤燈三十載
昔時綠鬢秋霖改海波可枯山可虧妾身誓死不可移

端陽應制

九重闔闔開黃道香雨清塵潤瑤草鑾輿遊幸鳳城南
錦繡江山勝蓬島御雲流彩映紫清薰風綺樹嬌鶯鳴

花園禁藥肅萬騎仰見金鉞羅霓旌須臾中使傳宣下
特勅羣臣張大射酒如川涌肉如陵陳賞奚論萬金價
鴈翎矢逐神飈馳平分楊柳璫瑛枝綵門嵯峨報毬度
恍覩碧落流星飛鵷鴻班列懽穀沸欣遇太平全盛世
河清海晏天地寧紫塞丹崖皇化被京華五月逢佳辰
萬乘閱武行時巡文臣將士同愉樂康衢傳播歡聲新
微臣躬感風雲會況沐天恩降滂沛年年今日奉宸遊
聖壽長齊天萬歲

題高士謙畫竹

錢塘高君愛脩竹拄杖敲門看不足經營慘淡入胷中
落筆縱橫萬竿玉昔年曾向大梁遊曳裾王門經幾秋
淇園晴菴數千頃興來信手風蕭颼白頭老作京華客
暑往寒來歲頻易豪家僧舍總相迎到處畫屏留墨迹
夏官司馬舊同鄉牙籤玉軸圖瀟湘只今君乘黃鶴去
此卷什襲歸珍藏公署朝回頻展對滿堂冉冉生雲氣
山雨飛遮鼓瑟祠江風吹碎凌空珮我昔尋君白玉堂

簷花落盡青燈涼
宛然屈指疑昨日
自歎鬢影沾吳霜
人生聚散有如此
世間萬事東流水
古今回首在須臾
何必溟波變桑梓
我欲招君不可追
芙蓉城裏自芳菲
倘思故國平生樂
好逐岐山綵鳳歸

奉和御製詩

如來有法名圓覺
圓覺由心不由學
虛靈本體鎮長存
炯然獨照羣昏爍
爍盡羣昏煩惱無
碧天湛湛秋皎如
坐卧行藏皆自在
澄波不種一葭蘆
靈山大義曾宣演

了義何須語重轉智者能通脫枯殼凡夫未達抽空塵
紛紛世上醉夢身瞋瞋不知求正因羊腸九折問舟楫
鯨濤萬里尋車輪皇天命我聖天子普濟羣迷敷治理
八荒四裔總陶甄沈溺顛連悉扶起法王演教闡大成
圓機慧性由三生竭來謁帝駐靈谷天籟皆為天樂韶
引陳今古茫茫劫湏解夙生修淨業自然騁駕上康衢
脫却迷途山萬疊都人嚮仰駢闐來祇園復見琪花開
恍疑手扳南斗柄身登十二瑯樓臺又如親覩釋迦佛

路入雪山高嶺窟和風麗日浩無邊五色神光互照歟
黃金座上示尊嚴綠水芙蓉色相兼或時出定還入定
瑩然銀海涵霜蟾益知靜默為真法文字徒塵辭雪霽
青陽一夕到東園九土根荄悉萌甲真詮信不在支離
試看腐草光差差神通變現皆至理天造地設非人為
佛教陰能翊皇度衆人快覩爭披霧天書灼赫粲雲章
侍從羣臣難繼賦頃令山水皆清妍洞庭鉅野張鈞天
奎光煌煌同佛日照我皇明聖祚萬萬千千年

贈卜士羅景中

君平昔隱城都市曾聞先天開卦肆百錢一日足生涯
獨坐焚香門靜閉一自仙遊去不還清風千古灑人間
姑蘇有客好沈靜術精龜卜家閭闔春風花開秋葉落
此身不受塵羈縛已將心事付浮雲長日逍遙有餘樂
姑蘇前度盛豪華甲第連甍凌紫霞一朝事往人何
在翻作尋常百姓家何如寂寞無拘繫俯仰窮探得深
意天心水面風月佳得失榮枯兩相棄

贈胡相士

平生素志在韋布躍馬食肉非我慕恭逢聖世拔羣才
叨從時賢廓高步邇從天上賦歸來偶遇胡生懷抱開
知君已得唐舉術愧我元非蔡澤才

逢故人夜話

結髮未有

闕

託交盡才雄與君同戲賦曾謁蘭臺宮滿

堂總是青雲客一時聲聞凌烟虹寧知失志淪江海歲
月無情不相待北遊屈指幾人存鏡裏朱顏暗銷改知

君試宰古青州旋聞投紱歸林丘恍然客館見顏色疑
是山陰雪夜舟相逢却憶少年日怒髮上衝森似戟黃
金百鎰一旦空何事栖遲困朱墨興來擊劍鸛鵒舞平
生心胃為君吐丈夫零落草芥間三尺兒童共唾侮狂
談極辯感慨多長夜迢迢未半過解貂難當吳姬酒其
奈空齋明月何明月耿耿星叅差銀河倒掛天南陲與
君且卧待明發欲濟蒼生猶未遲

書巴陵女子詩於丈丞相詩後

襄陽城上降旗舉回首烽烟昏鄂渚忠臣不獨李泌州
節義更有巴陵女巴陵女子魏公孫結髮歸向闕門

南來故族多衰替唯有安陽家範存當時倉卒惟鋒鏑
猛士雄夫猶喪色從容濺血寫羅裙此志誰與巴陵敵
宋家宗社三百年奸臣賣國真可憐安知殺身成仁者
乃在銀臺寶鏡前長江滾滾流滄海埋玉沈珠竟何在
夜深月照海門秋當與巴陵並光彩後來青史知屬誰
名氏不共闕妻垂願書文相哀憤什繼錄巴陵慷慨詩

送人復任

巴君抱志清以廉蚤歲苦學甘齏鹽復膺歲貢登太學
晨立館下恒恭謙年深拜官趨縣幕北闕拜謝衣襜褕
天恩浩蕩不能報誰謂祿秩微且纖致官不改在閑操
官舍有突或不炎家人從君告空乏君獨不異終日恬
揭來輸漕拜丹陛民望返轍頻東瞻復尋歸路赴官所
長江雨晴春水添太和回首在何處舟前翠黛廬峯尖
邑人謦謳候沙際老雉爭立首皓黥君今惠愛有如此

何必馬駟車施檐宦途豈無顯位者鼠竊雞啄長不厭
孰云毀譽無足畏名在士庶口用噉曾聞勁草挺風疾
更想貞松凌歲嚴我訝贈君激末俗薄位豈得長相淹

送太學胡秀才

胡君家住淮河上力學養親無外尚挺然自是不凡材
選進巖廊待良匠俄從俊秀趨邑庠旋登胄監朝明光
璞中良玉發溫潤匣底寶劍開鋒芒大廷求士懸美祿
小大畢收無棄逐長安衢路東復西貴戚權豪列華屋

侯門投刺宣無媒獨掩書惟生綠苔遊情肆志究青簡
長使功名心似灰京華客遊春復夏夢魂忽落孤雲下
飄然請謁賦還家拜命即行寧俟駕一盃相送鳳臺春
落絮飛花江水濱同袍共惜仙舟遠故里爭看綵服新
人生出處何須計父母俱存真樂事渭城歌徹柳青青
極目淮山渺烟際

鬪牛圖

時雨新收芳草綠水田犁歇春畊足牧童高卧古樹陰

隴上閒牛自相觸各爭勝負氣轉雄不知為私還為公
應笑當年掛書者誤隨李密遊山東

陽春曲

鷓鴣啼斷聲沈沈十二樓前晴翠深海日初紅鏡中曉
滿窻楊柳生繁陰遲遲簾幕生羅綺帳暖流蘇人未起
九街珂珮已朝天夢魂猶在濃香裏覺來忽聞長樂鐘
獨倚朱欄春恨濃不知昨夜東風急却恨滿街花雨紅
再奉和御製詩

天開圖畫烟霞間
仰瞻闔闔虎豹闕
如來法王駐幢節
大啟勝會同靈山
黃旗紫蓋龍蔥起
龍盤虎踞臨江水
花城近接鳳城東
金殿紅樓碧霄裏
寶花座上辯懸河
法海晴飈百丈波
八極神王來拱護
九天星斗共森羅
敷揚至理開冥昧
陰翊皇綱轉昭代
信知隨處即真如
大道本來無定在
世人惟識色非空
未解根源空色同
烈火自在清水底
輕塵忽染寶光中
遂將事物論成毀
昧却無中有真體
春來花卉滿郊原
眼界莫分紅與紫

百年貿貿成迷惑身世焉知脫微纆幸逢聖主開太平
玉帛梯航朝上國法王來自金天西弘宣大法醒昏迷
要令化雨沾庶類柳枝水貯青玻瓈只今祇園是靈谷
祥雲佳氣常輝煌曇花飛墮半空來大地山川總芬馥
時時法界出榮光照見原野晴茫茫又看寶塔現神影
綵翠煥發花間廊龍駕躬臨天咫尺迴鑾每待西林夕
河清海晏聖情歡長日從容多暇隙湛然止水澄靈臺
紅蓮不染秋江埃鸞騰鳳舞御宸翰煌煌日月中天開

揭之丈室龍光遠玉戶瓊窻相皎皎萬年長鎮法王居
臣民永樂春臺曉

送人歸四明

四明開郡溟濤中地與歐越相交通更唐歷宋生息異
民物實與諸華同南渡故族多依止文獻往往存流風
安知百年太平後楚涉作俑先羣雄海濱忽舉烽火起
城廓但見烟霧濛當時海內久寧謐父老不識操戈弓
出門相見共垂泣何異犬豕遭羶熊廟堂安坐共肉食

誰肯謀慮殫貞忠偷安苟出一時算表請章服蓬萊宮
朱溫遂得拜使節侯景未幾超上公遂令樂土成割據
不復衆水歸朝宗時清送君還故里使我懷感心忡忡
剩水殘山定何似故家喬木應已空念昔東行曾到日
郡中名勝多探窮湖心寺前秋月白曹娥江上春花紅
別來屈指三十載回首舊遊難再逢逢君歸去弔遺迹
緘書為報西飛鴻

商賈行

揚州橋南有賈客船中居處無家宅生涯常在風波間
名姓不登鄉吏籍前年射利向蠻方往平行販越海洋
歸來戴貨不知數黃金遶身帛滿箱小婦長干市中女
能舞柘枝謔白苧生男學語未成音已教數錢還弄楮
陌頭車輪聲格格畊夫賣牛買商舶

為盛惟性題謝孔昭畫山水

我本漁樵山水客半生放浪狂蹤跡十年朝謁明光宮
回首洞庭雲霧隔幾迴飛步鳳凰臺大江茫茫萬里來

黃旗紫蓋披天起王氣葱籠五色開登臨壯觀快心目
九點齊州烟霧簇千金不惜沽酒貲自信平生心事足
歸來重覓洞庭遊水光冷浸山光秋故人喜我天上至
依舊忘機有白鷗行將結珮趨金闕分襟復與親知別
詩成寫向畫中看蓬島三花不堪折

李龍眠山居圖

羣山蒼翠開雲屏中有飛瀑懸青冥綠陰深鎖白日靜
千巖萬壑花娉婷龍眠居士神仙客平生常著遊山屐

荒崖幽谷遍經行野鶴閒猿總相識百年人去空青山
獨留翰墨傳世間畫中三友如何即高躅那遠那能扳
我生夙抱林泉癖家住吳家山水國十年遊宦客京華
回首五湖烟樹隔晴窗對畫歸興新綠蘿飛花瑤草春
我當招起龍眠友拂袖同為林下人

青城山人集卷三

欽定四庫全書

青城山人集卷四

明 王燧 撰

五言律詩

右掖門對雪

東閣暘初起西山雪尚凝
風沈金鐸靜雲擁玉樓層
賈誼留宣室相如卧茂陵
自慙衰朽質進退兩懷冰

送張孟經歸松江

我昔客遊處送君孤棹歸
湖山想仍在故舊總言非
傾

別酒新熟到家花未稀吟情與離思相逐共依依

題贈鹽士吳彥才

舊夢吳門月新遊上國春居留琴作伴行有藥隨身欲
學壺中客還為物外人自緣忘世累非欲事沈淪

送廬州驛丞

鎮澤何處是淮水汴流間有祿誰云薄居官每得閒花
藏公館暗蘚入客亭班攷績重臨日長年飽看山

雞鳴山見桂花

月殿誰曾種仙家別自栽高秋萬木落空谷一枝開風
隔林中度香從天上來因思賦招隱愧乏小山才

送姚文靜下第歸省

數年遊太學才冠魯諸生誰料還家日翻為失意行春
衣遊上苑寒食別都城且盡娛親樂良材待晚成

寒江送別

結束辭親去王程恐後期河梁送行處江路變寒時落
月它鄉夢孤雲舊里思及瓜當有代覲省未應遲

勤農軒為族兄德章賦時挈家居聊城

罷挾干時策因從壟上畊十年辭茂苑數口寄聊城故
業桑麻在新居卉木成相望千里外徒此愴離情

萬松圖為華詳叔題

天矯萬株松青山深幾重將為高士搃不受大夫封風
雨經秋夕冰霜逼歲冬後凋終自保桃李若為容

西齋獨坐

餘照忽西沈蘿窻結暝陰幽情誰與晤孤思不能任松

風發遠響石瀨苔清音感此懷良友因之托素琴

送徐一校書宰固城

江草縟芳辰江花艷晚春方為帝城客復送故鄉人離
思雖云慘官程自此新琴堂非小試要見俗還淳

為張仲照題秋野軒

城郭囂塵遠郊原爽氣浮霜丹千樹葉雲白一天秋
涉蟹螯初薦溪蓴米乍收滄浪濯纓罷長揖謝公侯

同諸友七寶泉燕集

磴轉青巖斷泉歸綠竇深擷芳遵礪曲列席就蘿陰野
迴寒雲徹山昏夕照沈酒酣情未極延賞洽幽心

又

與子乖違後年華幾度更寧知在茲夕忽復叙幽情山
月含秋影風泉急遠聲相看吟坐久中抱有餘清

送友人之官

春山春樹綠相送去何之拜命辭朝日分符出守時花
連渚宮暗潮沂楚江遲鼎郡彫零久疲氓藉設施

送夏秀才赴征北幕

長劍辭親愛，將酬報國心。
家鄉一騎發，關路萬重深。
旆卷迎邊日，笳鳴亂夕陰。
遙知征戍將，開幕待陳琳。

冬夜客館懷王達善

幽齋人寂寂，獨坐抱相思。
正是離居夕，況當遲暮時。
堦空寒葉響，窻暝宿烟滋。
安得瑤華發，山中踐素期。

宿徐良夫宅留別

月中人語歇，松子落空山。
高樹風初響，閒燈門半關。
今

宵暫同宿明發惆孤還別有重來興溪陰暮雪間

題倪雲林畫

叢桂已消歇白雲亦悠悠當時鴻山宅花落空林秋平生山水趣晚歲江湖遊撫卷三歎息空遺晉風流

寄友

不見熙真久此心將奈何每因佳節換倍覺別愁多駐景功應熟居閒氣轉和無由聯夜榻清月照窻蘿

又

寂寂重扉掩天秋夕氣新風前初落葉燈下未眠人直
道其如命無謀只任真憂心似衰草惟待發陽春

怡親堂

務本承先業逃玄事養真雖云各求志却喜共怡親
隸萼聯芳日斑衣競舞春我尋純孝傳端不愧前人

送俞紀善調宰魯山

草章猶在篋花縣去鳴琴舊擅聲華重新沾恩例深崇
大明主意惜別故人心分守長安道因風嗣德音

又

故人離別久忽見各開顏我老塵埃際君辭霄漢間全家三泖遠百里一官間卓魯留遺傳高風諒可攀

送王以貞主簿親老歸養

聖朝推孝治之子去寧親戀闕丹心切還家綵服新山經秣陵晚門掩若溪春今古重榮養如君有幾人

夜坐

牢落它鄉客淒涼獨夜魂殘燈孤館靜斜月小窻昏蘇

子裘雖弊張儀舌尚存此生窮達事不必問乾坤

又

夜坐鄉愁切燈前客影孤高天初上月羣樹正啼鳥漂
泊更新節蹉跎困壯圖此心獨未朽匣內有陰符

挽邵處士

雅望推鄉里清風播縉紳抱才猶未展齋志竟長淪蘭
邑溪堂靜椒峯壟樹新幽光當不泯鉅筆勒貞珉

挽金洲吳處士

有士抱高節逍遙在林丘布衣輕組綬天爵傲公侯心
逐閒雲卷身隨野鶴遊何由歌楚些薦藻謁金洲

又

脫迹浮名外遊心太古先一經傳後似獨行繼前賢高
致由泉石清風表墓阡行人徒仰止灑泪綠蘿烟

送僧住京口萬壽寺

京口千年寺長江獨去僧舊名題萬壽大法演三乘鐘
罷潮聲續樓高蜃氣騰金焦昔遊處何日約同登

送倪堯明知沙縣

沙縣知何處閩中去路賒
一官仍出宰千里復辭家
瘴雨檳榔葉晴風茉莉花
願君防薏苡白璧自無瑕

題錦江迎養詩卷

迎親因美祿出宰得名邦
綵服臨花縣琴堂治錦江
曾參端有並安賤豈無雙
想見三年後民風盡變龐

送僧住靈巖

百花深處寺猶指舊吳宮
事往人何在香消徑已空
今

朝送師去茲地闡宗風別意兼鄉思依依雲樹東

送趙廣丈赴任

胄監初投迹黌宮再調官行看新教洽莫歎舊羶寒
闕路春將近都門雪乍殘諸生迎拜日揖讓杏花壇

送通政寺丞章有常使朝鮮

已受蘇卿節還乘博望槎金章龜伏紐紫誥鳳盤花
明主親頒命藩臣敬拜嘉寧煩遣荀彘環海久為家

又

三韓輿地內四郡海濤邊聖主思申命廷臣選獨賢下
情宜訪度上德在敷宣莫愛千金劍將貽漢史傳

又

玉節辭朝去樓船截海行天王頒正朔藩國荷恩榮
極雲無際雞鳴日已生邦人知禮分冠蓋出郊迎

又

授節褒遐服臨軒遣使臣忽銜明命重榮賜襲衣新鯨
海尋封域龍江發去津涼風仙桂月翹首望車塵

又

茅土開封日符章鎮國時朱蒙通漢使玄牡奉殷祠獄
訟邦人嚮宗祧世祚垂從今千萬歲與國共無期

致思堂

果樹皆初植琴書是昔遺先人存故物孝子致長思學
禮趨庭日承歡舞綵時此心那可盡徒咏蓼莪詩

送某編修姪還江西

阿咸辭叔父春晚別京畿家在江西住人從天上歸離

筵柳枝短佳會竹林稀知子廬陵夢依依對瑣闥

送人之官

滇陽餘萬里一命荷恩深應宿郎官職分憂聖主心治
勞煩製錦俗化藉鳴琴雲翮終難滯還棲在上林

遇王子淵

分違十五載容鬢改平生乍見忽忘姓相驚各道名離
愁無限積往事幾迴更又作臨歧別淒其感我情

哭曹給事

署職居仙禁分曹掌士師那知彌月病永間百年期堂
有衰齡母家無主祭兒親交臨旅櫬嚮哭有餘悲

又

秋色淒丹旒驚颺颯素幃文成賈生賦舞罷老萊衣草
聖從今絕交情感昔非那堪愁正切鄰笛怨餘暉

送杜德潤

相聞十餘載未得叙平生撫卷歌三疊依然含別情吳
江楓葉下楚澤蘋花榮去去母留滯西風一棹輕

寄友人

世味渾忘却身心得少閒
臨池看白髮把酒對青山
經史三餘外桑麻十畝間
優游期卒歲寧料阻時艱

再用前韻奉答

君本逃名者如何亦未閒
秋風發叢桂孤杖別家山
落征塵裏遑遑歧路間
相逢一惆悵空感世情艱

秋夜對月

桂月高秋滿蘭堂獨夜長
涼光浮露葉清響亂風篁
徂

謝悲餘景彫傷感衆芳所思千里阻重此值淒霜

挽唐愚士二首

久入平津閣新趨禁掖門
賓筵存舊禮翰苑荷殊恩
竟抱漳濱疾俄招楚澤魂
不堪愁絕處鄰笛怨黃昏
飄風翻總幕落日閃丹旌
未展生前志空遺歿後名
托交知己任執紼故人情
旅櫬東歸處淒然泪滿纓

雨後夜坐

荒村踈雨後茅舍在溪邊
半夜涼初透孤燈人未眠
病

多詩思少客久世情便却憶年來事茫茫總可憐

送人之官

高歌傾別酒撾鼓發官船
烟柳千絲雨鶯花二月天
且拚今日醉定約暮春還
凱奏彤庭曉歡聲動日邊

送人

幼時曾客處今日送歸人
東海一千里流光四十春
江山應似舊花鳥幾經新
故友如相問衰容與病身

又

同謁天官選君歸我獨留本期聯轡去翻作異鄉愁雲
杳曹娥渡江空白鷺洲欲知相憶處倚遍月明樓

送人復任合浦縣簿

鳴騶何處去南海復之官路入蠻溪暗珠還合浦寒鹽
車非伏驥籬枳暫栖鷺聖主求賢急飛騰諒不難

挽廬陵蕭先生

德行稱先輩威儀式後生青山初晦迹丹闕早知名方
逐搏鵬舉俄驚賦鵬成讀君匡世策雪泪灑長纓

又

出處恒師古憂傷每感今展禽將比迹賈誼本同心江
右儀刑在天南歲月深有經傳令子身沒勝贏金

送朱校書赴任餘杭

玄成傳世業膺薦謁承明特授儒官去仍尋故里行烟
花曹女廟春草越王城總是曾遊處難為送子情

東王先生

先生懷魏闕未肯卧林丘分別纔旬日相思又莫秋碧

雲連遠道綠芷歇芳洲還念歸來否忘機有白鷗

答友見寄

鶯歇蟬初動經春別故扉勞君遙問信是我正思歸夜
館煩虛榻秋風擬拂衣蓴鱸雖可戀何似北山薇

東彥起秀才

身抱丘明疾家罹原憲貧親年迫垂老兒齒未成人分
別山中冷相思澤畔春何當歸去後訪子問艱辛

追賦楊氏夜遊

十二百驚鴻纓鈴小隊叢蓋張遮桂月扇動度蘭風翳
翠釵梁重芙蓉袴褶紅今宵向何處將入望仙宮

又

朱城壁月懸西市臨車鈿金鐙銀花鏤雕鞍翠羽填黛
輕眉月細膏滑髻雲偏馳道爭先絕君王中使宣

又

銀燈隱絳紗流彩映鉛華挿鬢金鸞小填蛾翠鴈斜衫
寬藏半摺綬解綰雙花共覩新粧束相邀進內家

又

紅錦簇鞍韉宮西小市邊更衣寬寶帶勻粉落花鈿袖
窄揚鞭易靴輕下馬便君王好夜飲留醉鳳樓前

述懷

三十未得志栖栖無所投空持五經笥不遂一身謀土
蝕張華劔塵生蘇子裘何如覓歸計負郭有田疇

又

識命當隨寓無營只守真安知執圭者乃作種瓜人周

道荆榛合窮山蘭杜新母云菽水薄朝夕可娛親

題林泉居卷

舊叅林泉隱新從朝市人行雲流水夢芳草落花春世事終難料生涯莫任真茫茫天壤內到處是通津

雨中江館偶成寄山中諸友

雨聲意外曙獨客夢魂驚陽月看仍盡春衣縫未成空將倦遊意併付憶歸情寄語山中侶松間有舊盟

寄畊漁子徐良夫

理世無遺逸君何獨遁逃方知唐虞盛乃遂巢由高耕
田中吳野下釣五湖濤帝力我安有熙然縱遊遨

寄虞公務

泛泛蹤難定皇皇思每驚歲年知幾換書劍竟何成多
雨江村夜孤燈客館清此時誰共語唯念昔同盟

贈丁秀才敏

君年逾一世我齒越三旬本是同懷者俱為失路人栖
栖在羈旅落落困風塵安展凌雲翼相期據要津

送王之常

搖艇綠江頭江花昨夜秋正當人欲去復值雨初收楊柳踈烟渡芙蓉落晚洲離情不可道盡逐水東流

送春官主事陸伯瞻使朝鮮

寰宇同文日春秋一統年仙郎辭粉署星使泛樓船海極神黿際天連旭日邊何慙張博望勲業著青編

又

臣民歸正朔名器重繁纓蕃國忠誠切朝廷寵賚榮日

邊龍節去海上使
神明重續東方傳
誰論漢將名

春夜對雨

遠漏沈餘滴空齋
夢乍闌燈搖風影
亂窻掩雨聲寒節
序愁中駛鶯花客
裏殘故園歸去晚
惆悵負春蘭

少年行

出身本六郡結愛
入三川舊是良家
子新從俠少年黃
金裝劒珥綠錦製
鞍韉笑殺成都客
窮居事草玄

和唐侍讀歲除韻

青歲芳華啟玄陰節序窮寒收燈影裏春入漏聲中弱
志憐今異新懷與舊同嚴城冠蓋動爐炭已銷紅

送楊仲宜歸閩中

一門推二妙蘭玉喜同榮之子旋歸日難兄眷戀情皇
都半秋候鄉路幾時程應有重來約春風花萼生

又

不識閩闕路迢迢天一涯因尋鴻鴈侶來詠鵲鴿詩官
舍同眠夜滄江獨去時明朝相望處兩地各含思

閩中楊仲宜氏不遠數千里來京師謁見其
伯氏諭德公勉仁盤桓月餘告別余聞而喜
曰若仲宜可謂真知敬其兄者矣夫京師名
貴之囿也韋布之士辭鄉井來遊者鮮不役
於是仲宜條然而來飄然而去無意乎此非
誠心敬其兄者哉因賦五言短體以餞永樂
五年秋八月既望承務郎右春坊贊善兼翰
林檢討青城王汝玉

東施景仁

膺薦朝仙闕承恩返舊扉終酬元亮志謹識治長非晴
巷青楊合春園綠韭肥生涯方滿目從此可藏機

題看花仕女

玉臺裝乍整纚履盼行雲羞臉團紗掩嬌蛾淺黛分翠
鬆連理帶香膩七襄裙竚立花庭下含情怕夕曛

寄曾先生

理世方招納君何獨避名遨遊遍山水談笑却簪纓身

與閒雲侶心將世事輕吳山舊栖託應是為尊羹

又


月色經秋半懷君今夜心徒然期晤語翻此間徽音烟
寺微鐘度江城遠析沈何當一乘輿搖艇款溪陰

送舍弟璉

送爾出門去出門行路難時方重財賄孰肯禮儒冠沙
晚鵲鵲苦雨淒棠棣殘好營甘旨養歸奉二親懽

挽毛國子

投荒知幾載拜闕始逾年正喜經緯設俄驚客館捐病
妻嗟失倚弱息歎誰憐重聽山陽笛含悽徹九泉



青城山人集卷四

欽定四庫全書

集部

青城山人集卷五

八至

詳校官檢討

臣

羅國俊

中書

臣

劉源溥覆勘

覆校官中書

臣

田尹衡

校對官中書

臣

嵇承志

謄錄監生

臣

劉文耀

欽定四庫全書

青城山人集卷五

明 王燧 撰

五言長律

和徐高尚同陳胡二文學虎丘遊集

中吳饒佳遊茲山極殊觀磅礴踞臯陸巔岼軼霄漢靈
巖南蔽虧震澤西衍漫宕堯見城堞參差瞻里閭飛甍
凌嶽出紺宇橫林奐餘霞皎夕陰初旭縟晴旦宗周昔
無象四國爭發難闔閭紹遺業傲倪霸東翰雄圖未終

卑官車忽云晏年遙代祀忽世變物情換深藏閔雨花
曲池幕烟蔓崖崩留鑿紋石駁餘創斷諸君美無度假
日窮幽翫憑峭信多覽弔古亦增歎伊子旅江壖接武
嗟阻限聆風仰清穆披藻羨芬爛重尋倘能卜偕行願
相贊

送縣尹某人薦舉復職

邑庠初勵志太學早蜚聲經學推先輩文華厭後生幕
賓曾署墨巡戍舊題名薄宦浮沈久頻年寵辱并自期

成委致何幸遇清明薦剡騰丹陛徵書下玉京拂衣辭
隴畝被褐謁銓衡復贊琴堂去仍為花縣行莫言淹驥
足誰謂滯鵬程百里謳歌洽三年政績成天官稱考最
朝士譽才英日麗雙龍闕春明五鳳城臨江開祖帳出
郭送行旌南浦生芳草滄洲長杜蘅願言持贈別勉予
樹忠貞

送李僉憲

晨興趨禁闥夜直在仙闌十載濡華筆三朝侍袞衣忠

誠曾歷試政事每無違北闕除書降南方憲節飛清霜
隨部署明月照駢騑瘴嶺梅花早炎天雁侶稀明朝空
悵望何處待音徽

送儀曹主事陸伯瞻使朝鮮

鯨海洪濤裏雞林旭日邊皇風涵八表使節降中天往
賜殊恩享來朝甲令懸舊知鄰日本新號復朝鮮禮樂
存殷後衣冠做漢前詩歌四牡什書讀旅葵篇沮水功
全陋新城績浪傳聖圖寧有外王道本無偏職貢梯航

日河山帶礪年只今同內屬不用將樓船

絲竹堂

東魯分支遠西江衍派長風雲開勝景絲竹敞華堂架
貯籤新插書存壁舊藏口傳思伏勝妄意笑共王聖道
乾坤大經文日月光方今逢盛治奕葉看流芳

送人之官四川

暫輟分曹秩初懸刺史章承恩辭建禮銜命出昭光峽
束瞿塘險山盤劍閣長蒲鞭隨騎後卉服拜車傍已見

風聲被行聞德化彰大廷重考最計日遑鵷行

送祝少卿使朝鮮和大學士王達善韻

治教千年會車書萬國同蕃邦修貢禮報使選時雄文
物商周在封疆漢節通洪濤翻地白初日射天紅海服
皇圖內邊人聖化中敷宣當奉職要在復箕風

青林小隱圖

綠波三泖外青嶂九龍前別有深林境新開小洞天晴
陰千頃合春樹幾村連翠濕榆將墮紅深花欲燃寒蘿

朝帶露煮石暖生烟庭養華亭鶴門維笠澤船方期事
真逸更擬謝煩緣忽應徵書起旋將舊業捐閩中陪製
錦江右佐鳴絃夢斷居閒日心存報國年烟霞盟暫輟
松柏操彌堅又報山中侶空移蕙帳篇

送太醫院使戴元禮歸金華

金華初脫迹紫禁早知名旋起丘園隱來沾雨露榮青
囊存藥秘玉檢貯方精先帝稱純謹今皇重老成兩朝
親侍從十載盡忠誠請告衷懷切推恩睿筭明賜金分

御帑祖帳溢都城草色丹陽路花香白下程將期過巖
子應擬訪黃平童稚臨門候親知夾道迎還家雖樂具
戀闕自魂驚知近初陽節趨朝聽珮聲

送唐太守

初贊霜臺憲旋遷粉署郎趨朝常秉禮入幕每持綱重
沐君王寵新懸刺史章均州江水右夢渚楚山陽秋岸
丹楓落涼洲白芷香別來何以贈先世有遺芳

青翠軒

寢扉臨勝絕春竹瑣檀欒凝翠棲經幌分青度藥欄粉
飄風際曉穉解雨中寒簷外雲三徑牆陰玉萬竿懸知
禪講罷鳴鳳下瑤壇

致樂堂

奉親思致孝養志啟華堂映日斑衣粲迎風錦幕張鶴
垂耆耄髮雁列子孫行椿樹連遶茂萱花近砌芳田荆
紛蔚蔚實桂發穰穰酒獻千金壽爐供百福香承顏和
氣集政頌德音揚繁祉方無已遐齡政未量長年皆樂

事寧賦采蘭章

題桂山堂

不作淮南客還歌桂樹秋堂依林下
故人似月中遊白
亭涼新透清郊暑乍收風從小山度
香入九天浮城市
心應遠烟霞志已酬攀援如有意
歲暮共淹留

送永豐教諭陞襄陽教授

九年鳴教鐸三考謁銓衡
職典黌宮舊官超大郡
榮成規存吉水新訓著襄城
登峴懷羊祜垂帷慕董生
春歸

習池晚花發大堤明想見傳經暇從容載酒行

崇陰書屋

烟霞開勝境林壑帶幽居終日心無累長年樂有餘時
過三益友賸貯五車書縫練收螢火燒芸辟蠹魚風吹
朝幔卷月暎夜窻虛已致青雲上還思素服初丈夫終
一德窮達復何如

哀故友

宇宙經紛潰江湖減舊知可憐今日淚又為故人垂我

昔叨鄉榜君方謁泮池雖當童稚歲早見老成姿靈鳳
初辭穴神駒不受羈昂昂呈骨格采采濯威儀自合凌
丹漢應須置玉墀風烟一飄散寒暑久乖離杜曲身彌
困盈川譽日馳停雲空悵望落月累成思郭外閒投迹
山中喜踐期絳紗新帳設綵筆麗詞攜志趣朋儕畏才
華月旦推吾徒獲佳侶鄉校遇良師幾度聯徐榻常因
入董帷夜吟燈數剪晝論晷頻移村轉千花裡山蟠巨
澤湄知將遂栖隱正擬得攀隨不意干戈變俄驚衽席

疑片時殊寵辱反掌易安危骨肉歸何處精靈失所之
慈親痛鉗赭愛子陷囚縲薤露行歌杳銘旌返葬遲伊
人乃如此造物竟奚為大廈轟霆震連岡烈火滋那能
分玉石宜復惜櫨攘有禮行哀問無家致弔辭昨來過
寓所但覺益淒其欲秉中郎筆難書有道碑天秋氣蕭
爽日夕影參差暗壁封苔暈虛窗胃網絲題閒桂泉詠
酒罷潄溪卮中散琴安在山陽笛自悲傷今腕方扼感
逝頻重支劍化豐城後珠沈合浦時徒然歌楚些魂斷

不堪追

過尹山東庵

地湧琉璃界天開翡翠林
那知近湫隘誰意得幽尋
日麗花臺迴雲橫貝闕深
紺園浮霽彩琪樹帶春陰
玉礪珠泉滴丹窻綠嶂臨
梵王紅錦服仙女碧瑤簪
金作山龍甲朱為海鳥襟
鳴鐘驚雉舞講法引猿吟
境靜塵難染機深慮不侵
願因清淨力從此識真心

代閨人怨

壁月鑑朱扉金風復動幃熏爐添夕燼華燭散炎輝孤
人處蘭室蕩子別金微月莫頻墮謝春草屢芳菲腕玉
銷璫釧啼珠染翠衣調絃閒寶瑟織錦罷鳴機夜衾懷
嫵婉晨鏡惜容微夢畏靈雞喚心驚旅雁飛往歲從征
北連年屬建威馬邑方無戍龍城已解圍念茲桃李月
那能獨不歸

題闕

五岳真遊遠三山勝景賒何如赤縣裏自作野人家大

隱齊東魯閒居類浣花雪中丹鳳闕舍外白鷗沙山影
搖書幌波痕上釣槎詩成江愈淨夢覺日將斜案有閒
僧帖門無俗士車遺安付心事習靜寄生涯還憶終南
捷名聞少室誇君今誰得似終老在烟霞

五溪放棹為嚴明威賦

昔聞五溪險今見五溪平總帳迎風卷樓船帶月行烟
花蜀相廟露草伏波營已竭忠臣節仍全孝子情白雲
悲望切黃壤喜沾榮古栢森神道堅珉勒墓城此中方

眷戀葵罷促還程

清真軒

甲館連甍起閒軒勝景開誰言居戚里宛似入蓬萊樹
接天家近山從上苑迴涼飈排闥至空翠拂簷來竹粉
飄琴薦松花落酒杯鶯啼烟外柳鶴卧雨中苔寄興多
佳賞陪遊得上才永和千載遠文采共昭回

和故鄉諸友見寄

昔別逢條桑今還值鳴蜩遠遊淹辰節離思結昏朝水

宿我情慙山栖子志超半生懷隱止中道困淪漂雖積
巖壑眷恒違樵牧招日歸未溫席于邁復揚橈仍將風
波習再與朋知遙杳杳寒蓬轉茫茫秋梧飄感儀寧乏
操慕鳥豈無謠事繫竟難解心懸徒如搖唯當敦久要
不為歲寒凋

訪山中故人

整策陟幽峻尋雲入靈谿藤蘿互蒙密崖磴紛盤紆長
林條數轉春鳥時一啼稍覺去人遠詎知行路迷欣值

息心士幽獨在巖栖清晤冥夙契微旨啟玄機於焉素
懷愜澹然凡慮非明當稅塵鞅投迹恒相依

青城山人集卷五

欽定四庫全書

青城山人集卷六

明 王燧 撰

七言律詩

瓜州道中

清江杳杳水連空
江北江南綠映紅
三月異鄉逢改火
經春遊子怨飄蓬
滿汀蘆葉孤舟雨
一樹梨花小旆風
遙望故鄉何處是
依稀烟樹五湖東

雙溪草堂

清溪窈窕合流深長望茅堂溪水陰
明月關河千里夢
夜窻燈火十年心題詩尚記江如練
列坐空思風滿林
安得投簪陪杖屨一庭春草暎青衿

春日左掖門聞鶯

落絮飛花滿禁城萬年枝上一鶯鳴
全非幽谷閒關調
總是東風宛轉聲啼處尚含求友意
斷時猶帶惜春情
朝回左掖門前聽疑是仙韶奏九成

新秋早朝

宮井梧桐葉乍飛新涼先到侍臣衣
蒼龍闕上銀河轉
丹鳳樓頭玉漏稀宿衛分行環輦路
夕郎鳴珮出仙闈
嗟余虎觀叨陪從簪筆慚無補萬幾

寄北京韓院使

分別長干不記年南樓明月幾回圓
情生疎雨殘燈後
人在重雲遠樹邊此地寒銷葭管夜
南方春近杏花天
嗟余久抱漳濱疾願撿書囊啓祕傳

送馬先生致仕還松江

十載蠻宮坐冷氍毹因致仕遠辭天桑榆暮景逢明世
桃李春風憶少年送別同傾江館酒賦歸獨泛泖湖船
慙予亦有尊鱸興夢繞吳松烟水邊

送人歸吳

相逢不計別來年君鬢如蓬我皓然親友凋零知幾在
江湖飄蕩喜俱全九重請告承新寵五柳還家老舊田
明發京華又分別春風應送洞庭船

寄衣曲

素練辭機夜搗砧烏啼桐井月移陰三年異域無來信
萬里征衣寄別心霜重已忘刀尺冷風高長憶塞垣深
榮勛莫在班超後日日空閨待好音

送韓伯永之北京省父

嚴親端笏侍龍旗愛子相從著綵衣千里神都瞻王氣
兩淮春水漾晴輝蘭茗暖近香初動梅萼寒銷雪乍稀
相見承歡調膳處即看行幕是庭闈

挽學士王達善

金少府集卷六
縞紵論交兩少年相逢不覺共華顛蓬沙紫塞憐分袂
風雨青燈憶對眠投老喜看居內相抱疴忽報掩重泉
九龍山下梁溪路目極丹旌思黯然

送浙江僉憲之任

吳水吳山錦繡中太平簫鼓萬家同朝端新授觀風節
使者初乘按部驄九里松留梁舊寺萬年枝隕宋遺宮
錢塘風俗猶存古秉節須煩卧治功

送張孝逸

天書曾賜返巖扉重應輶車拜紫微振袂曉趨中禁路
濡毫畫坐列僊闌雲邊日轉龍旗動花裏風輕玉漏稀
大典告稱恩露重春來莫憶故山薇

挽王之常先生

生平英邁薄秋雲野鶴飄搖迴不羣早歲常懷千里志
莫年空臥五湖濱嗟無嗣子題新主幸有諸孫輯舊文
不識許山先壟下誰書徵士表清芬

送人還鄉

一別芹宮舊講壇幾年歸去卧林泉承恩重應徵賢詔
休老還尋負郭田官驛曉雲迷楚樹大江春水放吳船
世麟堂上遺經在應與諸生理舊編

送太守徐彥威

路出都門指八閩送君方值柳條春漢庭循吏推黃霸
潁郡遺民望寇恂雪水滿江催畫鷁棠陰夾道引朱輪
銓衡考績論公最知是專城第一人

為周丈威題菊庭卷

親王受冊鎮長城上將分符總重兵
仙闕九重頒命出
星輶萬里向西行
藥囊舊貯丹經祕
詩卷新承賜翰榮
什襲珍藏歸父隱
虹光夜貫斗牛明

送太平劉知府復任

錦繡江山拱帝畿
上皇曾此駐龍旗
三年出守勞綏撫
再命專城遇眷知
桑柘千村豐庶日
歌鍾萬戶太平時
送君重去宣王化
明世休論治蠶絲

送翰林王孟暘叅將安南

暫輟含香直晚班
新叅將閫出平蠻
黃茅綠樹千重嶺
瘴雨蠻雲幾處闌
去馬正逢椰子熟
歸旌定及荔枝斑
知卿素有雄豪筆
須勒神功鎮海山

送王孟端隨駕之北京

龍馭時巡幸北京
屬車侍從魯諸生
周廬未徹黃茅起
磴道新開輦路平
星拱紫垣嚴宿衛
天臨華蓋肅行旌
馬卿素有凌雲志
應有詞章頌聖明

送文淵閣待詔端孝大使朝鮮

扶桑日出曙光寒
帆掛長風積水寬
漢武開邊分四郡
聖朝遣使撫三韓
河山誓重畿
封遠雨露恩深
島部安想見藩臣迎節下
猶存黼黻舊衣冠

七夕次蘇校書韻

玉樹金風晚乍聞
秋光南國未三分
露涼將擬投班扇
才拙空慙續柳文
千里憶歸吳苑外
頻年客計楚江濱
仙家此去知何處
只隔瀛洲五色雲

送吳侍書省墓

三年染翰值仙闈
新沐天恩請告歸
但使丘原仍似昔
誰論松菊稍云非
朝衣入里人應羨
白首榮親古尚稀
相送不須生別思
春風佳會在金扉

題虞山景

平生未識海虞山
攬秀曾因圖畫間
雲入空濛開倒景
僧依蒼翠閉禪關
湖田稼熟秋千頃
烟浦舟行路幾灣
天上歸來暫停轡
何當留我老年閒

送王孟端侍從北巡
予亦將適武清先賦奉餞

子昔朱顏我少年梁鴻溪上愜周旋相逢正喜情如舊
屈指方驚歲屢遷行李欲為投北計東書先上渡江船
它時重剪西窗燭應在春風易水邊

次齋宿詩韻

聖王報本奉彝章親御玄丘祀昊蒼文命誕敷開景運
精誠昭格顯神光九天星暎中庭燎午夜風傳合殿香
璫署仙人歌盛德抽毫欲賦媿揄揚

題韓御史椿萱堂

濟南簪紱傳家舊闕下恩榮受賜新烏府諫書推二妙
華堂綵服奉雙親椿萱並美陽和節蘭玉同沾雨露春
驄馬聯馳誰不羨清風端可繼前人

送龔郎官

闕下陳情拜至尊天書賜告出都門星郎舊掌銓衡寄
黃壤新沾雨露恩奕葉遺芳今日見百年喬木幾家存
嗟余亦忝簪纓後世澤荒涼愧子孫

送順昌伯雲南撫安

分間曾登上將壇金貂新插鷄冠身輕百戰君恩重
威振三邊敵膽寒幕下偏裨皆許歷座中賓客有馮驩
丘符又向西南去談笑風生六詔安

壽董學士

昔將忠藎事先皇南去歸來兩鬢霜德重三朝兼傳相
名高四海仰文章承恩曾賜金蓮炬退食新開綠野堂
天上忽頒宸翰降奎星午夜動輝光

又

金章殿下日初移白玉堂深午漏遲後進咸宗鄒魯學
滿朝皆識帝王師新承鳩杖頒恩日正值蟠桃會宴時
聖主只今方倚重未容歸踐赤松期

送人告老還鄉

太學棲遲共幾年風燈蓬鬢影蕭然鄉闕回首思千里
章奏陳情徹九天荒逕許尋彭澤菊全家全上楚江船
歸時莫問生涯事故物仍存有舊氊

聞錢仲益自杭州獲歸

空江秋晚憶分違回首俄聞世事非異國頻年嗟久滯
故鄉今日喜重歸黃花漸發逢新雨白鳥仍來識舊磯
咫尺對君湖水畔何當放棹款柴扉

送李僉憲

兩朝染翰侍君王新荷深恩秉憲綱日射繡衣辭殿陛
潮催畫鷁上湖襄長風鵬翼初橫漢官驛梅花盡帶霜
想見露車行部日應從召伯問甘棠

又

拂曙綸音降紫微鳳池仙客繡為衣先朝故舊如君少
四海交遊似我稀雲散都城新雪霽寒生江路早春歸
懸知別後趨朝日猶憶相從向瑣闥

客懷

水流花謝總無情臥病漳濱百感生自笑田園荒舊業
却將文字覓虛名春來又見羣芳動老去都無一事成
故里鶯花應念我行將長揖謝公卿

又

逢掖雖云是舊衣故山終負采春薇時清懶上王通策
病久常閒董子帷寰宇同逢新節至江湖自覺故人稀
平生多少關心事空學莊生蝶亂飛

又

夜靜燈寒獨掩關滿窗風雨響珊珊客中自信貧非病
老去方知懶是閒寺遠無尋僧作伴林深思與鶴同還
枕邊又聽朝鐘動憶蓬鴻鴻綴末班

送胡典仗賜告還鄉

班分彩仗列廷墀侍衛親王典漢儀嬰疾正當強仕後
乞身未及老年時心懷未卹行猶戀身到青田夢尚疑
欲報君恩何處是好將忠義付佳兒

題右江遺墅

陰陰喬木帶江沙建武年來世緒賒
麾節頻沾新雨露山林不改舊烟霞
綠深椰子經春葉紅綻蕉叢過臘花
曾讀雲臺諸將傳子孫繁衍有誰家

送人之越

我昔東行到越州別來回首幾經秋
停雲尚憶當時興送客偏增感舊愁
曹女祠荒花自發賀家宅廢水空流
不知故友今誰在煩向春波問白鷗

湖西別業

豫章城外楚江邊舊業猶存季子田
雉雉蠶眠三月暮桑陰麥秀幾家連
將同杜老家夷曲似學王維住輞川
我本五湖畊釣客滄洲空羨白鷗眠

送曾先生

吳江楓落水增波忽報山人放棹過相見政將懽意接
送歸無奈別愁何風生晚澤薰葭響雨歇空山烟霧多
此去幾時重聚首歲寒有約在松蘿

送人之官

黃茅遠接海雲邊官驛迢迢路幾千客騎曉看梅嶺月
行裝春上廣州船陶潛未遂歸來志馬援猶堪矍鑠年
想得到官敷政日那人爭拜玉堂仙

送魏秀才

江湖遊蕩欲何依
末路誰能禮布衣
木落霜天秋欲暮
風生澤國鴈初飛
辭家已久行囊盡
為客無謀相識稀
明日重歸故鄉去
里人應誚讀書非

次費剛中秀才見貽詩韻

一載漂零江海行
與君俱是一書生
心同孤館秋燈影
夢斷重門曉珮聲
啼鳥殘花傷往事
暮雲春樹動離情
相看只隔吳淞水
空羨風前短葦輕

又

艱關曾記共君行
此際相思別恨生
四野荒山橫暝色
孤城落日起秋聲
星霜冉冉蹉跎感
湖海茫茫故舊情
麗句枉投難報謝
自慙金玉尚為輕

寄友

鶯歌江鄉杜宇悲
故人遙望久乖離
夢因春盡歸常切
書為山遙寄每遲
疎雨林邊尋古寺
夕陽嶺下謁荒祠
匆匆已負瑤華約
別有西風桂子期

懷范宗文

君去遨遊尚未歸北風吹雪正霏霏懸知此日生涯薄
應悔平時直道非舟泊空江聞鴈斷路逢寒草過人稀
吳興巨室多豪傑誰識當年舊繡衣

送人歸省

新沐天恩拜玉墀宮衣榮映綵衣時仍從東浙家鄉去
應咏南陔孝子詩白下餘花香未歇赤城芳樹綠初滋
知君戀闕丹心切良會須先露冷期

挽吳處士

平生晦迹卧林扃太史應占處士星十畝桑榆閒暮景
一蓑烟雨釣寒汀遺安已得龐公計傳後無煩韋氏經
欲挹高風何處問蘭陵塚上有新銘

又

烟霞深掩故山扉投老林泉一布衣野夢不縈青瑣闥
閒情常在白鷗磯藏書篋滿傳家遠種秫田多帶雨肥
忽厭塵寰向何處青松寂寂鎖斜暉

寄吳中故人

鄉心離思共依依吳水吳山悵久違客裏頻看流景換
老來偏感故人稀百花僧舍思攜酒細雨春林憶采薇
一枕飄零江海夢夜深空趁蝶交飛

送徐子信還吳

渡頭初聽采菱歌送子還鄉意若何碧樹霜前紅葉少
青山雨後白雲多共憐杖屨遊桑梓仍羨衣裳製芰荷
簪筆自慙無所補空令華髮歎蹉跎

紫翠丹房

洞門深鎖鳳城春，迴隔長安陌上塵。
雲裏山光寒幕入，雨中柳色過窗新。
自緣習靜成閒逸，非欲逃名事隱淪。
想見齋居清晝永，藥爐丹竈每相親。

送友之西秦

天子臨軒命近臣，遠持憲節鎮西秦。
瑣闌暫輟封章奏，駿馬行看出撫巡。
幽地應非周故俗，茂林無復漢遺民。
關中父老郊迎日，為播朝廷聖化新。

秋夜

碧天涼月漾金波玉漏微時夜半過客夢不知歸路遠
鄉心偏是到秋多鵲驚孤影翻風葉蛩帶寒聲起露莎
遙想五湖烟雨好無由重整舊漁蓑

次張真人見寄

玉京神觀喜佳逢始信蓬山有路通忽報仙幡臨草澤
驚看畫鷁下天風涼生晚渚芙蓉老霜隕秋場稼

以下闕

青城山人集卷六

欽定四庫全書

青城山人集卷七

明 王燧 撰

五言絕句

東郭襟詠十首

仲遠家東郭予家東郭東春秋閒暇數輕舟
往來遇景留連輒成歌詩積時既深不知累
什

東城

家住東城下時登東城上東城幾古今一望一惆悵

草堂

草堂近東郭綠水遶縈迴荆門多不掩時有清風來

葑村

荒邨依野葑樹色水光邊人家知遠近犬吠隔溪烟

莎灘

莎灘溪水汜灘上煙莎綠日夕少人過閒鷗自來宿

柳汀

閒汀多種柳窈窕入溪潯東風花落盡滿地是春陰

苔徑

塵機暫已忘塵事日應遠試看徑中苔朝來深與淺

紅蕖港

流水深成港芙蓉照水新葑溪非鏡曲莫誤浣沙人

綠萍灣

清溪知幾轉靡靡綠萍多莫赴流紅去漂淪將素何

石庭

石庭平且敞規制非雕鑿家僮頻掃淨留待閒花落

菊籬

種菊東籬下芳叢經雨生膏粱不可食日夕待餐與

佳賞軒雜詠

往歲在鄉里時嘗為朱亮字伯貞記佳賞軒
及來京師又持卷索詩因追賦軒居故事為
五言八章時亮新擢禮科給事中暇日一披
詠之不知如身在軒中否時庚辰冬十月也

南園

蘇郡庠初並東城殊極隘陋范文正公有園
在城南相地者云茲地當踵生公卿公曰與
其私於一家孰若公於一郡遂以之建今學
云

南園夷且曠水木凝華清天開景明淑仰見昔人情
道山在學宮西廡後

開軒道山下時登道山上美人今在否日暮增惆悵

泮池

泮池深且廣綠水浸紅蓮輕風雨餘至演漾起澄漣

杏壇

空壇有繁杏藹藹綠生陰清風何處起猶自聽鳴琴

古檜在明倫堂前或傳文正公手植

古檜依堂陞曾聞昔賢植歲寒霜霰多不改青青色

來秀橋太湖水東來由橋下曲折入學宮流渠

並西牆

石梁跨新綠源長流愈清何須滄浪水可以濯塵纓

春雨亭

閒亭對春雨窈窕來城陰初滋千門柳復沾松桂林

采芹亭

高亭臨泮水綠芹生水陰長年時采擷列坐有青衿

題高彥敬畫

孤榜繫落日清風秋思長隔溪望林閣夕靄正蒼蒼

題徐幼文畫次高季迪張來儀韻

雲生疎林晚花落空山春裊徊林下路惆悵山中人

題王思敬扇

家住綠蘋州軒窗瞰碧流夜來疎雨過涼思到沙鷗

題畫

疎樹葉全脫衆山雲半收高人坐苔石風露一身秋

又

葉暗前朝雨花飛昨夜風空山人不見春在綠陰中

又

山影照清流涼生杜若洲夜來江上雨添却幾分秋

詠兔

芳草滿陂綠草中狂兔行只今罷虞獵來去任縱橫

又

青松鬱如蓋下有兔爰爰徘徊知何事應待望舒圓

題雙鳥圖

婀娜綠楊枝上有雙鸚鵡馬知九苞鳳終擇丹山宿

又

翩翩雙好鳥同集一枝安誰知瑤島上別有青琅玕

題蘭

楚楚九畹姿托根孤石上清風久不來含芳獨惆悵

又

古石生幽蘭孤芳貞且妍何由遇君子移置瑤臺邊

婕妤怨

長信秋風起昭陽夜月明相看一步地各自不勝情

又

歌聲何處動獨立又黃昏自愁成感歎不是怨君恩

梧桐竹石圖

高梧冒嵐密修篁依石疎憶在西林院閒窻涼雨餘

山齋

齋居在山中長日人來少石壇花落多時有東風掃

玩古軒

松下有閒軒鳴琴間圖史今人非古時古人今已矣

竹磴

種竹繞礪濱蒼然晝如晦故人期未來自清風至

白石坡

坡上有青松坡下多白石還愁蒼蘚生何處尋行迹

清陰谷

垂陽何靡靡繁陰覆谷中芳春信多嫩預恐起秋風

埜壘

閒齋面瀟灑欲謝塵中綠四坐杳無際此心方淡然

枯木竹石

西風昨夜秋琪樹芳華歇獨有修篁枝虛心保貞節

題竹

粉籜解香苞新梢展鳳毛空庭明月夜只恠粉牆高

寒江獨釣圖

空江不見人飛雪紛如剪獨有垂釣翁孤舟水雲遠

題竹

志士勵貞操君子抱安節請看艷易花何如後凋葉

又

籜香初解粉葉嫩正含安長保青青節相期歲晚時

橋亭八詠為宗人府經黃子中賦

澧陂春漲

春陂昨夜雨綠水潮來漲應有放歌人濯纓陂水上

香爐紫烟

紫烟明復滅窈窕孤峯曉松風吹不消何處看飛鳥

龍磴朝嵐

朝嵐龍磴生復度青林上咫尺不逢人唯聞樵笛響

田東暮雨

負來春暮暮東風灑靈雨歸時少路昏悵望誰為侶

雲源仙笛

閒雲深幾層孤笛雲邊動泉聲忽相亂莫辨梅花弄

聖容僧鐘

山色杳冥中煙霞最深處因聽風外鐘知有閒僧住

甘泉飛瀑

危峯高不極瀑布半空飛巖風吹莫滅恐濕綠蘿衣

天寶懸崖

懸崖空翠表下瞰羣山低靈仙望不至誰與登雲梯

題畫雜咏

月出孤松陰風生百泉響空山不見人解帶蒼苔上

又

花開山色中鳥哢泉聲裏相對澹忘機辟書徵不起

又

潮痕帶晚沙雲影連春樹隔浦漾舟來應尋酒家去

又

濕翠暎繁紅東園起暖風春光何處是都在鳥聲中

又

亭亭一片雲飛墜青嶂間未肯從龍去長與幽人間

古石蒼檜圖

石間有蒼檜乃是青雲安願君慎培養歲晚以為期

題畫梅

淺白睡時粧輕清雪後香憶曾相見處江店月昏黃

題雅室

深院沈沈晚香崖獨自飄忽聞琴瑟聲都是相里潤

青城山人集卷七

欽定四庫全書

青城山人集卷八

明 王燧 撰

七言絕句

題趙松雪畫

自從玉馬去朝周
雲散花飛幾度秋
寶玦玉還零落後
吳興留得晉風流

題趙仲穆畫

十二瑠樓紫翠重
萬年琪樹落秋風
南朝無限傷心事

都在殘山剩水中

甯戚飯牛圖

寧辭掩馱褐衣單叩角長歌坐夜闌有志欲逢堯舜禪
如何功止霸齊桓

題畫送陳孟敷

君家門掩綠陰低古木叢篁水郭西我向京華望吳苑
桃花只隔武陵溪

題吹簫圖

玉簫聲斷鳳樓空人在烟霞紫翠叢何事沈郎千古夢
多情猶入紫微中

為朱仲昂題畫

誰家茅屋住深山路轉清溪第幾灣寄語桃花休亂落
恐隨流水出人間

題倪雲林畫

水流花謝白雲飛滄海桑田幾是非莫問蘭亭舊蹤跡
當時文采古來稀

唐宮七夕圖

花萼人歸鎖畫樓
長生殿裏看牽牛
關山風雨聞鈴夜
贏得鑾輿事遠遊

送趙友同之松江

畫船曉發鳳城東
江上青山雲幾重
秋水連天三百里
片帆一夜到吳淞

又

我別松江幾度秋
渚花汀草不勝愁
京華送子松江去

夢落滄浪舊釣舟

題趙仲穆畫蘭

吳興才子宋王孫
國步興亡不用論
北去歸來三十載
却將幽興寫芳蓀

咏姪孫鏞扇

我昨承恩賜告還
杖藜時到海虞山
十年湖海狂遊跡
暫喜登臨一日閒

題江村夜歸圖

汀葦蒼蒼白露凝一灘寒月未收罾西風吹醒江南夢
四壁蛩聲半夜燈

題畫

芙蓉城隔綵雲間咫尺蓬萊海上山見說瑤池花又落
不知青鳥幾時還

送山西行都司斷事

桑乾西去出長城白草黃雲足馬輕後夜它鄉見明月
鴈門關外望宸京

題倪雲林畫二首

清閨閣前芳草綠
小蓬壺上落花多
吳山西畔人何在
遺墨空存晉永和

逍遙天地一閒身
浪迹江湖七十春
惟有雲林堂上月
于今猶照昔年人

溪山高士圖

萬山環繞樹高低
十里烟霞路欲迷
一夜東風花亂落
暮教流出武陵溪

雙桂堂

堂前丹桂兩枝芳
堂上慈親兩鬢霜
幾度彩衣稱壽處
天香滿袖露華涼

題扇贈姜公實

玉堂退食苑鍾遲
不覺花磚日影移
忽報故人來問信
相逢却說故鄉時

寄畧道權上人

長干寺裏訪清遊
花落花開幾度秋
望斷碧雲人不見

夜深飛夢到揚州

題畫

五湖深處舊柴關
春水桃花第幾灣
昨夜東風吹夢去
白雲深鎖萬重山

桃源圖

天台山下綵雲邊
別有人間小洞天
劉阮凡情猶未斷
錯教花裏遇神仙

題槎處卷

金部口乃人三言
卷八
不隨星使沂河流却向荒磯侶白鷗我本綠蓑江海客
十年空憶在滄洲

題趙丹林竹

一枝斜影過牆陰青瑣窻寒夜未深却憶佳人在空谷
歲寒應念舊同心

與練綱題扇

天上歸來訪舊遊花開花落幾經秋喜看堂構還如故
玉樹芝蘭日漸稠

題畫菜

我本山中食蕨腸玉堂饕餮大官羊却思春雨閒園後
煮得新葵滿釜香

海棠便面

彩毫香染墨淋漓寫得東風玉一枝不似落陽花譜見
香紅新雨濕胭脂

題倪雲林畫次高季迪徐幼文韻

水流花謝歲華深江左風流不可尋留得當時陳迹在

永和遺墨寫山陰

題竹贈祖士英

湘臯日出楚煙消
綠玉參差罩碧綃
栖鳳一時驚夢起
滿林齊舞翠雲翹

杏林春曉

種得千株艷杏花
東風門巷盡頽霞
行人不識誰家住
錯認當年董奉家

題趙丹林竹

一家村上記相尋坐對蕭蕭風滿林
天上歸來重看畫
遼東鶴去海門深

為吳子敬題畫

雨洗清江十里秋渡頭水落放輕舟
客窗一枕江南夢
都在蘭汀杜若洲

題黃鶴山人畫

獨卧茅廬學孔明半生心事已無成
都將黃鶴山中趣
寫作烟霞物外情

題沈士儼畫

亂雲重疊樹高低不見人烟只聽雞
它日掛冠尋故隱
移家合住在茗溪

題王孟端竹

憶尋飛夢過湘江親見仙人葆羽幢
獨坐玉堂春晝永
誰分清影到晴窗

題竹鵲圖

新竹猗猗葉乍齊多情靈鵲戀雙棲
人間有喜常先報

不學城烏空夜啼

送胡郎中

長干道上含情別
明月樓前入夢頻
同是老年仍在客
如今莫說故鄉人

題幽篁蘭棘圖

裊裊新梢帶粉痕
一枝橫棘倚芳根
不知天上中和意
彼此同沾雨露恩

題桂陰老人

白玉堂前丹桂發
水晶宮外月輪高
坐聽清漏渾忘寐
涼露溥溥濕素袍

題池塘野步

曲欄干外暑風清
白葛生涼杖屨輕
花隱蘭舟看不見
時聞隔浦唱歌聲

青山白雲圖

遊子殊方清夢遠
慈親瘞玉白雲深
它年隴上松千尺
高節應同孝感心

秋江晚罾

殘陽潏潏照秋波
閒理漁罾下淺莎
但使得魚那怕晚
水邨南北酒家多

蘆汀夜笛

風捲蘆花雪滿洲
笛聲飛送一江秋
曲中都是滄浪趣
楚客聽來不用愁

題畫梅

誰將淺黛濕冰魂
褪盡當時舊粉痕
却憶故山殘雪後

淡烟籠月夜初昏

又

誰遣緇塵幕縞衣江南鴈盡淡忘歸羅浮夢斷梨雲遠
月映佳人啟素扉

題許瀾伯扇

十年不上讀書樓天上歸來訪舊遊却喜琴書今有託
莫年從此得優游

題畫留別許瀾伯

故人喜我遠還家却向溪陰放釣槎
且盡樽前一盃酒
明朝相望在京華

題秋林小景

孤筇何處事清遊
林壑生涼雨
乍收霜葉一枝紅
未脫
白雲深鎖亂山秋

送陳宗述之官西蜀

我從東去子西行
萬里橋邊萬里程
白下楊花多似雪
還應難比別離情

留別錫山諸友二首

我將策馬入神京諸子乘舟遠送行
芳草落花三百里依依總是故人情

當筵莫唱渭城歌此去京華路不多
明月相思情更切西風木落洞庭波

蕉石圖

瘦玉含香黛色新閒庭晝永悄無人
芭蕉展盡丁香結又是長門一度春

早朝

禁鐘纔動曉風微
疎竹脩脩對瑣闥
非是日高簾不卷
怕教空翠濕朝衣

題吳彥才畫

已將心事付行雲
莫問君家瑤草春
明日穆陵關外路
親知應念遠行人

題杏花山鳥

杏花過雨粉香深
老去秋娘瘦不禁
惆悵看花人不見

却將春色付山禽

梨花桑扈

桑扈交交拂曙鳴
梨花過雨羽衣輕
莫教舞落深窻裡
怕遣羅敷曉夢驚

海棠白頭公

海棠花發滿東風
猩血粧成萬朵紅
銀燭不來燒夜永
春情都付白頭翁

題卓迪畫

長江一道落青天北固山高凌紫烟曾記夜涼吹玉笛
海門星斗照樓船

題荷花

鑑湖烟月不勝春十里霓裳照水新汀鷺沙鷗俱未識
折芳應誤浣溪人

題高彥敬畫和高季迪張來儀韻

貞元大歷舊風流賦盡江南芷若秋何用山陽聞夜笛
水光雲影總離愁

題梅花

看花曾憶少年遊
江海狂蹤知幾秋
莫道何郎今老去
未教詩興減楊州

長安臘盡已春回
餘雪全消未見梅
紙帳夜寒清夢覺
梨雲空滿畫中開

萬山春雪不勝寒
幾度曾經載酒看
沈醉獨眠花影下
任教青鳥自啼殘

月色娟娟滿禁林
青綾被擁玉堂深
宮壺賜酒初醒後

只少梅花伴我吟

題畫

西風嫋嫋起林阿一夜新涼到薜蘿人在空江秋影裏
青山不似白雲多

題康王渡河卷

北來飛騎疾如風路隔長河勢已窮不有當時神馬力
中興誰辦百年功

為朱景昭題畫竹

西山故宅草離離
留得瀟湘綠玉枝
莫恠臨風倍惆悵
畫中盡是故人詩

和靖夜吟圖

娟娟霜月夜窻虛
隱几看花樂有餘
心事暗香疎影裡
平生不作茂陵書

普大雲水仙

洛浦仙人綽約姿
淩波塵起襪羅時
何年化作天花起
來散靈山大會期

題高彥敬畫

輕烟漠漠雨氤氳風景分明海岳庵北望房山數千里
如何清興落江南

題扇與練經

禁苑看花十二年歸來風景總依然當時壽愷人雖遠
喜有槐陰綠滿前

題華東湖畫

白髮東湖一老仙已乘黃鶴上雲烟至今遺墨留人世

清興橫飛太華顛

淵明把菊圖

典午山河已夕暉
却尋三徑賦旋歸
平生心事南山在
不為東籬待白衣

題扇別顧伯行

我別家鄉七月秋
相逢故舊更遲留
明朝相憶知何處
遙指蓬山十二樓

題畫三首

人家隔斷水西東，行盡溪橋有路通。
巖樹今朝全綠遍，夜來曾起落花風。

一別溪頭舊釣槎，十年頻看鳳城花。
天恩賜告歸來日，不識松蘿是我家。

暖雨初收霧尚昏，綠楊深塢杏花村。
山中少有凡人到，滿地春陰不掩門。

題竹

香露淋漓濕未乾，迎風翠袖不勝寒。
勸君莫取青青節，

留待丹山五色鸞
右雨滌鉛粉節

又

湘臯春盡玉青青
曾值西風過洞庭
碎珮叢鈴滿烟雨
夜深楚客不勝聽
右風搖青玉枝

又

春雷初響蟄龍驚
猛勢凌空天矯橫
幾度山窻親見處
露華如水月華明
右凌空勢方起

又

憶曾相對瑣闌深，制草成時日乍陰。
粉濕香濃春爛熳，歲寒霜霰豈能侵。
右得地色不移

錢塘觀潮圖

浙江亭上彩雲收，二十年前憶舊遊。
正是桂花初發候，月輪飛上海門秋。

王孟端畫枯木竹石為張繼孟題

古木疎篁倚石邊，不隨桃李鬪春妍。
平生留得冰霜操，別有幽期在暮年。

嚴子陵

獨將風節冠東京不向雲臺列姓名千古嚴陵灘上月
至今猶似客星明

張志和

風蓑雨笠幾經春流水桃花一釣綸身世自甘成兩棄
翻然終愧有莘人

題鳳池清影圖

粉濕香凝露乍消湘娥新整翠雲翹一春青瑣長相對

影轉金堦近午朝

留別吳秀才

重剪青燈叙舊懽
思深不遣戴南冠
平生留得丹心在
擬與貞松傲歲寒

紅梅

絳羅偷換玉精神
不是西湖舊日春
花落莫隨流水去
尋源恐誤放舟人

題竹

曾過陽明觀下春山前十里盡蒼筠東風吹送雲門雨
只聽鳴環不見人

題王汝璵扇

不向金門謁翠華一琴一鶴度生涯亂山殘雪西湖曉
看遍寒梅萬樹花

題畫

數峯相倚玉成簪樓閣深沈酒尚酣十日春寒簾不卷
杏花飛雨滿江南

送唐同知孟廉之任

楊子江頭曉發舟一官新任佐泉州
南方民物多凋弊此去當分聖主憂

題胡給事中畫

碧梧翠竹兩清妍陰落閒庭古石邊
未引丹山儀鳳宿畫長蓋我讀書眠

題東郭草堂次梁用行韻

日下西峯月上初微烟收盡四郊虛
長歌獨自還家去

却笑當年讀漢書

太白觀泉扇面為周上舍賦

芙蓉五朶插青天
百尺飛流霽雪懸
我欲乘槎上天去
不知何處訪詩仙

題畫


露莎烟草滿晴川
罷釣歸來暫泊船
非是野情忘世事
閒愁不到白鷗邊

又

仙水仙山有路通人家遙住白雲中一溪春色無人管
流出桃花片片紅

題謝孔昭畫

曾共滄浪釣晚風今朝江上又相逢莫辭同醉船頭月
明日烟波各萬重



青城山人集卷八